

UNIBERTSITATEA. UEUk abenduan egingo duen II. Kongresua «mugarri» izango da Euskal Unibertsitatearentzat

UEU berritu eta egokitu egingo dute Bilbon, abenduko II. Kongresuan

Udako Euskal Unibertsitateak, 30 urteko historia luzean, Euskal Unibertsitatea bultzatzea izan du helburutzat

Ainhoa Güemes | BILBO

Udako Euskal Unibertsitatea (UEU) berritu eta egokitu egingo dute abenduan egingo den biltzarrean. II. Kongresua abenduaren 14an egingo dute, Bilbon, Euskalduna jauregia.

Berritu eta egokitzeaz gain, abenduaren 14ko biltzarra «Euskal Unibertsitatearentzat mugarri» izango dela adierazi zuten UEUko zuzendari Xabier Isasik eta Mikel Aizpuru, Iñaki Marko eta Ane Sarasua UEUko kideek atzo, Bilbon egindako aurkezpenean.

Izan ere, UEUk 30 urteko historia dauka, eta 1973. urtean sortu zenetik Euskal Unibertsitatea bultzatzea izan du «xede nagusia».

Xabier Isasi UEUko zuzendariak hartu zuen lehendabizi hitza; azaldu zuenez, Batzar Nagusiak beharrezko jo zuen II. Kongresua egitea, «ez bakarrik egoera berria aztertzeko, baita UEUk berak izan dituen aldaketak hausnartzeko eta aurrera begira eman beharreko pausok emateko ere».

Udako Euskal Unibertsitatea 1973. urtean sortu zenetik, «Euskal Herriko gizarteak aldaketa sakonak izan ditu, eta haiek Euskal Unibertsitatea sortzen lagun dezakete», Xabier



LUIS JAUREGIALTZO / ARGAZKI PRESS

Iñaki Marko, Xabier Isasi, Ane Sarasua eta Mikel Aizpuru.

Isasik esan zuenez; aldaketa batzuk aipatu zituen: besteak beste, legediaren aldaketak, Europa Batasunaren eraldaketa eta teknologia berrien ezarpena.

1995. urtean lehen kongresua egin zuenetik UEU «berri baten aurrean» dagoela esan zuen Mikel Aizpuru UEUko zuzendari ohiak. Ildo horretan, ikasle euskaldunen kopurua handitu egin

dela eta «EHurekin gauzatutako lankidetzari esker» titulazio ofizialak lortu direla gogorarazi zuen, besteak beste. Gisa berean, Mikel Aizpuru eskerrak eman zizkion Bizkaiko Aldundiari Bilboko egoitza berria irekitzeko emandako laguntzagatik, baita Eibarko Udalarari Markeskora Jauregia uzteagatik ere.

Gero, Iñaki Marko UEUren II.

Kongresuaren artezkariak kongresuan landuko diren ildo nagusiak azaldu zituen. Metodologiari dagokionez, UEUk hausnarketa estrategikorako metodologia erabili duela zehaztu du. Hau da, prozesua ahalik eta parte-hartzaileena izatea nahi dute; «horregatik, txostenak bazkide guztiei banatuko zaizkie, zuzenketen bidez ekar-

XABIER ISASI

UEUko zuzendaria

«Euskal gizarteak izan dituen aldaketek Euskal Unibertsitatea sortzen lagun dezakete»

IÑAKI MARKO

UEUren II. Kongresuaren artezkaria

«Euskal Unibertsitate sistema eta lidergoa dira Kongresuan jorratuko diren kontzeptu berriak»

penak egin ditzaten», adierazi zuen Iñaki Markok.

Izan ere, txostenetan bi kontzeptu berri proposatzen direla esan zuen Markok: bata, UEUren «lidergoa», eta bestea, «Euskal Unibertsitate Sistema».

Azkenik, Ane Sarasua UEUko idazkari nagusiak abenduaren 12an egingo duten ekitaldi berezia aurkeztu zuen. Ekitaldia kongresua gizarteari erakusteko modu bat da, eta, era berean, UEUk 30 urte beteko dituela eta Mikel Aizpuru UEUren historiari buruz idatzi duen liburua aurkeztuko du ekitaldi horretan.

XABIER ISASI UDAKO EUSKAL UNIBERTSITATEKO ZUZENDARIA

«Mendebaldeko hizkuntza normalizatuen munduan, orokorrean, ez dago unibertsitate gabeko herririk»

Ainhoa Güemes | BILBO

Xabier Isasi UEUko zuzendaria da 2000. urtetik. Euskal Unibertsitatea sortzeko asko egiteke dagoela aitortu arren, oso baikor agertu da.

■ **Aurtengo Geroa orain leioarekin, zer adierazi nahi duzue?**

Batetik, kezka; *Geroa orain* esanik, esan gura dugu bizkor ibiltzeko. Euskararen normalizazioaren ikuspegitik, Euskal Unibertsitatea ezinbestekoa da. Europa soziala mintzagai den heinean, hainbat gauza aldatuko dira, eta euskal-

dunok present egon behar dugu.

■ **Euskal Unibertsitate Sistema, noizko?**

Geroa orain, Euskal Unibertsitatea ahalik eta lasterren. Frankismo garaitik gatoz, egoera zailtan hasi ginen eta jarraitu behar dugu. Euskal Unibertsitatea egun batetik bestera eraikitzeke aukerarik ez dago. Baina gure inguruan sareak nukleatzea posible ikusten dut. Adibidez, Ikastetxe Nagusia abian jartzea lortu dugu, baita gradu ondoko ikastaroak ere.

■ **Euskal Unibertsitateak**

euskaldunon arteko lotura indartuz, sakabanaketari aurre egiteko balio dezake?

30 urte hauetan lortu izan dugu unibertsitatean diharduten hainbat euskaldunentzako —belaunaldi desberdinetakoak— erreferentzia izatea. Beraz, belaunaldien arteko lotura UEUn bertan gauza daiteke.

■ **Gero eta neska gehiago biltzen dira UEUren inguruan. Horrek eraginik izan du antolakuntzan?**

UEU gizartearen isla besterik ez da; gure lan taldean egun 11 pertsona daude, eta horietatik 8 emakumeak dira, eta,

gainera, gazteak. Euskaltzalea naizen aldetik, niretzat hori oso ikuspegi positiboa da, euskara berreskuratzeko lanak nesken goi mailako formazioan beste oinarri bat aurki lezakeelako. Euskalgintzan gehien mugitzen direnak, isilean beharbada, neskak izaten dira.

■ **Kontuan hartzen du EUEk Europan dauden beste unibertsitate eredu batzuk?**

Irlandatik gonbidatu egin gaituzte urtarrian izango diren jardunaldietara, eta irakas-kuntza telematikoa eta hizkuntza gutxituak izango dira aztergai. Unescok antolatutako bisitaldian, Txileko maputxeekin bildu ginen, eta izugarri interesatu zitzairen gure esperientzia. Eredu ezberdinak egon badira; horregatik plan-

teatzen dugu II. kongresuari begira Euskal Unibertsitate Sistema, aukera bat baino gehiago egon daitekeelako. Mendebaldeko hizkuntza normalizatuen munduan ez dago unibertsitaterik gabeko herririk, eta, orokorrean, ezta unibertsitaterik gabeko hizkuntzarik ere.

■ **Zelan bereganatzen ditu UEUk euskaldun berriak?**

Neurri batean, goi mailako prestakuntza daukaten euskaldun guztiak euskaldun berriak dira. Euskara berreskuratzeko bi bide paralelo planteatu izan dira: batetik, erdaldunak euskaldundu, eta, bestetik, euskaldunak alfabetatu eta landu. Hizkuntza ez da muga; hizkuntza bidea da. Euskara ez da xedea; xedea euskalduna da, pertsona.